

SKUPŠTINA KANTONA SARAJEVO

**ZAPISNIK SA
OSME RADNE SJEDNICE SKUPŠTINE KANTONA SARAJEVO,
ODRŽANE 12.11.2015. GODINE SA POČETKOM RADA U 10,00 SATI**

Sarajevo, novembar 2015.

Sjednici su prisustvovali poslanici/zastupnici:

STRANKA DEMOKRATSKE AKCIJE

1. Ademović Kemal
2. Čelik Mirza
3. Čomor Eldar
4. Delalić Sabahudin
5. Dovadžija Amar
6. Mešanović Safet
7. Kozadra Muhamed
8. Mašović Amor
9. Okerić Elmedin
10. Prevljak Fikret

DEMOKRATSKA FRONTA – ŽELJKO KOMŠIĆ

1. Akšamija Goran
2. Avdibegović Neira
3. Bukva Sejo
4. Kerla Bibija
5. Mehmedagić Mersiha
6. Pindžo Mirsad
7. Vukasović Mario

SAVEZ ZA BOLJU BUDUĆNOST – FAHRUDIN RADONČIĆ

1. Babić Ana
2. Jusko Ismir
3. Marić Zvonko
4. Rađo Dževad

SOCIJALDEMOKRATSKA PARTIJA BOSNE I HERCEGOVINE

1. Srna Bajramović Srna
2. Šućur Slaviša

NAŠA STRANKA

1. Ćudić Sabina
2. Forto Edin
3. Kojović Predrag

BOSANSKA STRANKA – MIRNES AJANOVIĆ

1. Haris Pleho

BOSANSKOHERCEGOVAČKA PATRIOTSKA STRANKA – SEFER HALILOVIĆ

1. Halilović Semir

SAMOSTALNI POSLANICI/ZASTUPNICI

1. Bjelak Nermin
2. Aljović Hamed

Osmu Radnu sjednicu Skupštine Kantona Sarajevo 12.11.2015.godine u 10,00 sati otvorio je predsjedavajući Skupštine Sejo Bukva.

Prema evidenciji Službe, sjednici prisustvuje 29 poslanika/zastupnika, što je dovoljan broj za punovažan rad i odlučivanje.

Izostanak sa ove sjednice opravdali su: Selma Filipović, Rasim Smajić, Amel Mekić i Izudin Bajrović.

UTVRĐIVANJE DNEVNOG REDA

Prijedlog dnevnog reda Osme Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 28.10.2015.godine.

SKUPŠTINA JE ZA OSMU RADNU SJEDNICU SKUPŠTINE KANTONA SARAJEVO JEDNOGLASNO (29 „ZA“) USVOJILA SLJEDEĆI

D N E V N I R E D:

1. Poslanička/zastupnička pitanja, inicijative i odgovori;
2. Prijedlog zakona o izmjeni Zakona o nadležnostima organa vlasti Kantona Sarajevo u oblasti zaštite i spašavanja ljudi i materijalnih dobara od prirodnih i drugih nesreća-skraćeni postupak;
3. Nacrt budžeta Kantona Sarajevo za 2016. godinu;
4. Nacrt zakona o izvršavanju Budžeta Kantona Sarajevo za 2016. godinu;
5. Nacrt zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom;
6. Nacrt Poslovnika Skupštine Kantona Sarajevo;
7. Prijedlog odluke o verifikaciji Zakona o istaknutim samostalnim umjetnicima - Prečišćeni tekst;
8. Prijedlog odluke o izmjeni Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo;
9. Prijedlog odluke o izmjenama Odluke o preuzimanju prava osnivača Javne ustanove Studentski centar Sarajevo u dijelu kojim obezbjeđuje životni standard studenata („Službene novine Kantona Sarajevo“, broj: 24/00 i 21/06);
10. Prijedlog odluke o izmjeni Odluke o imenovanju članova Vijeća nacionalnih manjina Kantona Sarajevo;

Uz poziv za sjednicu, kao informativni materijal, poslanicima su dostavljeni:

1. *Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec avgust 2015.godine;*
2. *Izveštaj o utrošku sredstava Tekuće rezerve iz Budžeta Kantona Sarajevo za 2015. godinu;*
3. *Inicijativa za donošenje Zakona o izmjenama i dopunama Zakona o pripadnosti javnih prihoda u F BiH (Realizacija zaključka Skupštine Kantona Sarajevo).*

AD – 1.

POSLANIČKA/ ZASTUPNIČKA PITANJA I INICIJATIVE

Prijavljeni zastupnici za poslanička pitanja i inicijative: Mario Vukasović, Segmedina Srna Bajramović, Rađo Dzevad, Prevljak Fikret, Mersiha Mehmedagić komentar, Zvonko Maric, Predrag Kojovic, Bibija Kerla, Jusko Ismir, Edin Forto, Sabahudin Delalić, Semir Halilović, Mirza Čelik, Nermin Bjelak, Neira Avdibegović, Hamed Aljovic, Haris Pleho i Čomor Eldar.

Zastupnik Mario Vukasović je postavio zastupničko pitanje i pokrenuo jednu inicijativu: "Prva inicijativa jeste upućena Ministarstvu za obrazovanje nauku i mlade Kantona Sarajevo i Vladi Kantona Sarajevo. S obzirom da nisam dobio odgovor sa prošle sjednice koji se odnosi na status implementacije Zakona o mladima FBIH u Kantonu Sarajevo, opet ću se baviti ovim pitanjem na ovoj sjednici. Također zahvalio bih se Komisiji za mlade koja, je izvršila pravovremeno svoj zadatak i dostavila odgovor. Zamolio bih da mi se dostavi precizna informacija o implementaciji Zakona o mladima FBIH i u kontekstu ispunjenja obaveza koje Vlada ima prema ovom Zakonu. Ovim putem također podnosim inicijativu da se u program rada svih ministarstava u Vladi koja imaju obaveze iz ovog Zakona da za iduću godinu obavezno uvrsti i realizuje rješavanje svih pitanja proisteklih iz Zakona. Većina ministarstava u Vladi ima u svom domenu obaveze koje mora realizovati. Vlada mladima prema ovom Zakonu mora garantovati posebne programe za zapošljavanje mladih, usvojiti strategiju za mlade, posebne programe učešća mladih u društvenom životu, posebne programe socijalne i zdravstvene skrbi i sve druge obaveze proistekle iz ovog zakona. Apelujem da se uradi nešto za mlade, da se mladima pruži prava prilika. Nezaposlenost među mladima u EU se uduplala u proteklih šest do sedam godina, a stanje je alarmantno prema izjavama najviših čelnika EU. Ovo pitanje se danas postavilo na samu ljestvicu prioriteta za rješavanje. Razlog uzbune jeste svakako nezaposlenost mladih i njihovo ne napredovanje dovesti do ugrožavanja ekonomskih mogućnosti današnje Europe. Gotovo 23% mladih je danas u EU nezaposleno. BIH 67% mladih je nezaposleno. Znači zvuči zaista zastrašujuće. Bez namjere da ikoga omalovažavam ali navest ću vam neke podatke o stopi nezaposlenosti mladih u nekim drugim državama prema statistikama Svjetske banke. Mauritanija 43%, Svazlend 43%, Palestina 38%, Mozambik 14%, Moldavija 15%. Znači nalazimo se apsolutno na samom dnu svjetske ljestvice prema ovom podatku. Kao glavi razlog visoke stope nezaposlenih mladih u Europi je naveden zastario sistem obrazovanja koji više ne odgovara potrebama na tržištu rada. Ovo je jedna od ključnih stvari koje moramo realizovati stoga apelujem na Ministarstvo za obrazovanje nauku i mlade da u 2016 godini u Program rada uvrsti kreiranje novih upisnih politika na naših fakultetima i srednjim školama." Drugo jeste poslaničko pitanje koje je upućeno Komesaru policije Kantona Sarajevo i Ministarstvu unutrašnjih poslova: "Na osnovu kojeg zakona ili drugog propisa tj. međunarodnog ugovora su lica zaposlena na osiguranju u Američkoj ambasadi su ovlaštena da opominju građane Kantona Sarajevo da se udalje sa trotoara, tačnije javnog pješačkog prostora ispred Američke ambasade u Ulici Zmaja od Bosne? Napominjem da se ovdje radi o zaposlenicima Američke ambasade a ne državnog tijela BIH koje osigurava strane objekte i lica?"

Zastupnica Segmedina Srna Bajramović je pokrenula dvije zastupničke inicijative:

"Naime, pretpostavljam da ste iz direktnih kontakata ili putem medija upoznati sa humanom inicijativom o izgradnji spomenika Ženi Sarajeva koja je prošle godine pokrenuta od strane gdina Jovana Divjaka i Udruženje Obrazovanje gradi BIH, te osjećam obavezu da ovaj projekt kandidujem Skupštini i Vladi Kantona Sarajevo u smislu učestvovanja sufinansiranja

izgradnje istog kroz budžet 2016 godine. Želim istaknuti kako se u pripremnom organizacijskom dijelu projekta završilo sa svim neophodnim koracima koji su imali za obavezu osiguranje neophodne dokumentacije, izbora lokacije, odobrenja za građenje, tako da sada predstoji vjerovatno nateži i najizazovniji dio ovog projekta a to je obezbjeđivanje finansijske konstrukcije cjelokupnog projekta. Stoga vas molim da prihvatanjem ove inicijative pošaljemo poruku i drugim nivoima vlasti da se uključe u sufinansiranje ovog projekta koji u osnovi svoje ideje ima ogromnu simboliku, u smislu afirmacije vrijednosti uloge žene u teškom istorijskom kontekstu te očuvanje i trajnu afirmaciju tih vrijednosti u budućnosti. Obrazloženje bi vjerovatno bilo dugo, oduzelo bi nam puno vremena, kada bih počela spominjati sve one žene koje su obilježile taj period koji je iza nas, ali ću ga priložiti u pisanoj formi."

"Moja druga inicijativa tiče se, odnosi se na sazivanje tematske sjednice Skupštine Kantona Sarajevo o stanju sigurnosti u Kantonu Sarajevo. Mislim da nakon posljednjih dešavanja sa ubistvom bicikliste koji na žalost već mjesecima samo jedan u nizu tragičnih događaja, koji konstantno pune crne hronike kriminalnih djela u Kantonu Sarajevo, nikome dobronamjernom ne treba dodatno obrazloženje o potrebi za održavanjem tematske sjednice. Želim istaknuti kako se praksa dostavljanja informacija sa pozitivnim trendovima u statističkim pokazateljima nije pokazala kao efikasan mehanizam, niti je način suočavanja sa ovim ozbiljnim društvenim fenomenom koji nas sve više ugrožava. Na žalost, mi već mjesecima imamo upozorenja kako je ogromna razlika između stvarnog stanja u osjećaju sigurnosti građana i statistike, te stoga je vrijeme da se sa ovim problemom ugrožene sigurnosti građana suočimo na puno ozbiljniji način nego što je to bio slučaj do sada. Stoga očekujem da svi zajedno danas podržimo ovu inicijativu u namjeri da se tematska sjednica Skupštine pripremi uz ozbiljan angažman svih referentnih institucija u okviru izvršne, zakonodavne i sudske vlasti, a da kompletan proces pripreme koordiniraju nadležna ministarstva, MUP-a i Pravde."

Zastupnik Dževad Rado je postavio zastupničko pitanje upućeno ministrici zdravlja:

"Da li je tačno da ste Vi ministrice bez Javnog poziva i konkursa, kao i bez ranije saglasnosti Etičkog komiteta i Kliničkog centra u kojem se sprovoditi projekat odobravate dva projekta Dr. Ameli Begić s Nuklearne klinike? Prvi je ustvari nastavak projekta koji je trajao tri godine a vezan je za emboliju pluća, a isti nije polučio nikakve pozitivne efekte, produžen još dvije godine? Drugi projekat koji je, moram ponovo da naglasim bez ikakvog zakonski predviđene procedure dodijeljen pomenutoj dr. Begić koji također treba da traje dvije godine. Na kraju se postavlja logično pitanje, zašto je pomenuta doktorica Amela Begić privilegovana u odnosu na zakonom propisane norme?"

Moje drugo pitanje, da li se nova Esencijalna lista može naći prvo u apoteci pa tek onda na Vladi? Da li lijek bez kojeg pacijent ne može živjeti život, odnosno bez kojeg slabe drugi organi, može biti skinut s Esencijalne liste lijekova? Naime osoba koja nema paratiroidne žlijezde i doživotno radi podizanja jonskog kalcija, koji održava rad srčanog mišića mora piti ROKARTROL koji je skinut s Esencijalne liste i nema zamjenu, a košta 55 KM. Također, zbog embolije pluća potrebno je piti KSERELTO koji je do sada plaćan 1/2 cijene odnosno 72 KM, a od petka košta 176 KM, plus obični kalcij, hormonalne vitamine i sve što ide uz to. Postavlja se pitanje kako to da izdrži onaj pacijent koji je na birou ili penzioner ili zaposleni s minimalnom platom? Tražim da mi se odgovor dostavi u pisanoj formi."

Zastupnik Fikret Prevljak je pokrenuo dvije inicijative: "Prvu inicijativu bih tražio od ministarstva komunalne privrede i infrastrukture da u što kraćem roku izda nalog Komunalnom Rad za izgradnju javne rasvjete oko 2. Osnovne škole Ilidža, Općina Ilidža."
Obrazloženje:

Osnovna škola zauzima površinu od oko 5000 kvadratnih metara a trenutno je osvijetljena sa ukupno dva rasvjetna tijela koja su neispravna. Učenici OŠ i uposlenici i građani su svjedoci sve češćeg okupljanja delikvenata u noćnim satima koji narušavaju njihovu bezbjednost. Smatram da je ovaj problem treba riješiti u što kraćem roku kako bi se gore imenovani osjećali koliko toliko bar sigurniji.

"Drugu inicijativu bih prema Ministarstvu komunalne privrede i infrastrukture da u što kraćem roku izda nalog Komunalnom Park za potkresivanje platana u ulici Butmirska cesta kao i uklanjanje kompletnog stabla u ulici Butmirska cesta kod broja 72. platani čiji je jedan lijep drvoređ u naselju Butmir ali postoji potreba da se isti i održavaju i potkresuju jer visina ne bi trebala da bude veća od 8 metara. Ovo navodim sve zato što su platani već preko 15 metara izrasli, i dolaze do njihovih pucanja grana koje su jednom prilikom pale na autobus javnog prevoza kao i na privatna vozila te je načinjena materijalna šteta. A kod broja 72, ovaj platan što bi trebao da ukloni, nalazi se na raskrsnici i vozači nemaju pregled a na tom već mjestu se dešavaju i česte saobraćajne nezgodne."

Zastupnik Haris Pleho je postavio pitanje upućeno Vladi Kantona Sarajevo: "Da li su objekti škola kao državna imovina osigurani kod osiguravajućih kuća od rizika nastanka štete od elementarne nepogode, požara, itd. Ako su škole osigurane od gore navedenog rizika, da mi se dostavi spisak tih škola. Ako škole nisu osigurane od rizika nastanka štete tražim da mi se odgovori zašto nisu osigurane i ko će odgovarati za državnu imovinu u slučaju nastanka štete na objektima?"

Zastupnica Mersiha Mehmedagić je dala komentar: "Želim samo podsjetiti da nikada nisam dobila odgovor na Inicijativu za preispitivanje odluke o legalizaciji i rokova za podnošenje zahtjeva i da nisam dobila odgovor na pitanje postavljeno na prethodnoj sjednici a tiče se naplate koncesione naknade i potraživanja Kantona po korisnicima. Pa molim da mi se dostave pismeni odgovori."

Zastupnik Zvonko Marić je dao podršku inicijativi Segmedine Srne Bajramović te pokrenuo novu inicijativu: "Samo da podržim kada je već kolegica Srna uglavnom jedan dio inicijative obrazložila a ja bih samo dodao riječ je o izgradnji spomenika Ženi. Mislim da je to zaista plemenita inicijativa i sam sam mislio to potencirati i ne treba puno tu obrazloženja. Možda je to zakašnjelo i u neku ruku trebalo uraditi mnogo ranije, s obzirom na ulogu žene a prva asocijacija kada se kaže žena je majka i tu je sasvim dovoljno sve reći. Ne trebamo sada podsjećati sve ono što se dešavalo nama bliskoj historiji, počev od prve pogibije Suade Dilberović studentice iz Dubrovnika, i Olge Sučić, a ne treba ni spominjati heroinu Fadilu Žutu sa Žući itd., sasvim je dovoljno razloga da se i Vlada Kantona Sarajevo i Skupština involviraju u pokušaj da se ostvare taj plemeniti cilj. Što se tiče druge inicijative, ona se odnosi na to vezano za sigurnost građana, ja opetujem ono što sam već u nekoliko navrata rekao i mislim i da je ujedno i pitanje i inicijativa da po mogućnosti policija pojača kontrolu jer na cestama, iz prostog razloga što, pogotovo u gradu vidamo puno vozila bez registarskih oznaka. Vozila bez registarskih oznaka zapravo znače da nešto nije u redu, ako ništa prekršaj je. A svjedoci smo bezbroj puta da se pljačke obavljaju upravo sa takvim vozilima i znamo scenarij. Na kraju se to vozilo zapali. To je bilo tokom ranijih pljački i to je bio manir svih tih kriminalaca koji rade takav posao, ali pored policije koja je bila udaljena možda 200 metara vazdušne linije od pljačke jedne Raifasen banke i druge koja se isto u gradu desila, je nedopustiva stvar. Dakle vozilo bez registarskih oznaka i ako već insistiraju na nekim drugim manjim prekršajima u toj skali prekršaja onda neka obrate pažnju i na vozila koja ne posjeduju registarske oznake. I stoga molim da se podrži takva inicijativa i da se pojača kontrola na tom planu."

Zastupnik Predrag Kojović tražeći usmeni odgovor, postavio je sljedeće pitanje:

"U prošlom mandatu negdje na početku samog mandata, izbila je nešto što je poznato kao seks afera na Pravnom fakultetu, radilo se o profesorima koji su sada je to već utvrđeno u nekoliko sudskim postupcima kao činjenično stanje, razmjenjivali seks za ocjene sa svojim studenticama. Ovih dana prisustvujemo revitalizaciji tog sudskog slučaja i mene zaista zanima da čujem od ministra obrazovanja, pa rekao bih zanima me i stav Vlade, da li ljudi za koje se dokaže da su se upuštali u ovakve odnose i da imaju takve odnose prema studentima i studenticama, zaslužuju da budu u nastavnom procesu?"

Zastupnik Bibija Kerla je pokrenula inicijativu:

"Pozdravljam sve prisutne, cijenjenog predsjednika i podpredsjednika Skupštine, našu sekretaricu, uvažene ministre, kolege i kolegice zastupnike, drage gledaoce pored malih ekrana. Prije izlaganja moje inicijative želim da obavijestim sve one koji su brinuli za moje zdravlje da sam dobro i zdravo. Također molim sve one koji pričaju kako je moj kolega iz skupštinskih klupa Peđa Kojović kriv za ono što se desilo na prošloj sjednici Skupštine, kada je morala da interveniše hitna pomoć da prestanu sa tim pričama. Igrom slučaja diskutovao je Peđa prije mene i dogodilo se to što se dogodilo.

Moja prva inicijativa se odnosi na pokretanje fonda Skupština Kantona Sarajevo za pomoć najugroženijim sugrađanima Kantona. Obrazloženje: od trenutka kada sam postala zastupnik Skupština Kantona Sarajevo dobila sam toliko upita za pomoć ugroženim ljudima, pomagala sam koliko je to bilo u mojoj moći, ali ne mogu pomoći svima. Mislim da je ista situacija sa svima vama. S obzirom da je rad da se moj rad kao poslanika sastoji ne samo od sjedenja u kancelariji nego i obilaska terena te razgovora sa ljudima, došla sam do zaključka da moramo učiniti nešto da pomognemo one najugroženije koji su jednim dijelom zaslužni zašto mi danas sjedimo ovdje. Znam da su nas birači birali da usvajamo zakone koji bi pomogli u rješavanju svih problema naših sugrađana. Ali ni ti zakoni ne obuhvataju sve one kojima je pomoć potrebna. Predlažem da mjesečno izdvajamo 10% novčanih sredstava od paušala koji bi išao u taj fond i koji bi se mjesečno dodjeljivao onih najugroženijoj populaciji u kantonu. Nismo Merhamet ali zato smo ljudi, pokažimo našim biračima da mislimo na njih, daj da pomognemo one najugroženije kupovinom ogreva, hrane i lijekova, a vala ne bilo loše da i one koji nikada nisu otišli na more pošaljemo ljetos na more da i oni vide kako izgleda godišnji odmor jednog političara. Molim da se ova moja inicijativa stavi na dnevni red jedne od sljedećih Skupština i molim ministra finansija da mi obrazloži postoji li zakonska procedura za osnivanje ovakvog fonda?"

"Moja druga inicijativa se tiče postavljanja javnih WC-a na relaciji Ilidža Marin Dvor. Relacija koja je duga 7 km, nema javni wc, svakodnevno u parkovima možemo vidjeti pojedince koji bez imalo stida u po bijela dana obavljaju valjda potrebnu nuždu i zbog toga molim hitnu intervenciju i ugradnju mobilnih kabina wc-a kao što je to praksa u cijelom civilizovanom svijetu."

Zastupnik Ismir Jusko je postavio zastupničko pitanje:

"U vremenima kada čitava BiH ima priliku vidjeti da naši sportisti na svim poljima ostvaruju sjajne rezultate i da se dičimo njihovim rezultatima i da nam je drago da imamo prave ambasadore naše zemlje širom svijet koji donose rezultate a rade pod uslovima koji su katastrofalni, sportisti koji svojim rezultatima motivišu druge mlade generacije da se bave sportom, sa jedne strane, a s druge strane imate uprave kao što je Centar za sport i rekreaciju ili stari (FIS) koji kao motivaciju za sve sportiste i njihove klubove koji se bave sportom a treniraju u tim prostorijama podiže cijene svojih usluga za 40 %. Umjesto da ista ta uprava da trening ili dva mjesečno svim klubovima koji su unutra kao treninge za društveno koristan

rad, ona dovodi u situaciju da sportom se mogu samo baviti privilegovani. Već imamo najavu ogromnog broja klubova koji će otkazati termine, klubovi koji ostaju tamo radit će grupne termine, spajat će dva termina u jedan, odmah znate da nit će biti efektivni nit efikasni. Ili će povećavati cijene članarina i dovest ćemo se opet u poziciju da radnička klasa i radnička djeca ne mogu da se bave sportom. Apsolutno smo svjesni da ogroman broj djece u Kantonu Sarajevo odnosno njihovim roditeljima ne mogu priuštiti da se njihova djeca bave skijanjem ili tenisom, ali neki sportovi koji su nam dostupni godinama mogu da se bave i upravo CRS bio je sabirno mjesto te djece. Ja godinama gledam menadžere koji se diče svojim rezultatima budžetskim sredstvima. Imamo menadžere koji nikada nisu radili u realnom sektoru i onda dođu u situaciju da kada dobiju budžet apsolutno ne raspolažu sa njim na pravi način. Tamo imate zaposlen dio menadžera koji ja ne znam apsolutno šta rade, jer prostorije CRS doslovno zjape prazne i onda da bi nadomjestili gubitke koje oni prave i njihova nesposobnost povećaju cijene tih sala. Predsjedavajući, dopredsjedavajući, premijeru, znam da ste ljudi koji ste čitav život proveli u sportu, znam da ovim skupštinskim klupama sjede ljudi koji su proveli čitav život u sportu, znate i sami svjesni smo koliko transformacijski sport djeluje na našu djecu u momentima kada jedini radni alat koji imamo sada da našu djecu skinemo s ulice je sport, nama nesposobni menadžment diže cijene i dovodi nas u situaciju da će opet sale zjapiti prazne a da će naša djeca maltene otići na ulicu umjesto da borave u salama. Iskoristite svoj autoritet i zaustavite ovakav gnusan zločin prema mladim ljudima. Ja sam obavezan da ovim putem informišem građane Kantona Sarajevo da u toj ustanovi sjede nesposobni ljudi jer da su sposobni spuštali bi cijene sala kao stimulativnu mjeru a ne bi je podizali."

Zastupnik Edin Forto je pokrenuo inicijativu i postavio pitanje: "Inicijativa je za ovu skupštinu. Radi se o izmjenama Zakona o plaćama i naknadama u organima vlasti Kantona Sarajevo. Član 8 postojećeg Zakona o plaćama i naknadama u organima vlasti Kantona Sarajevo ima definiše nešto što se zove paušal. Ovaj Zakon definiše paušal na sljedeći način: „to je pravo izabраних dužnosnika na ime povećanih materijalnih troškova u obavljanju dužnosti“. E sada mene zanima radi se o profesionalnim poslanicima, koji su sada primaju platu za svoj rad u Skupštini. Kako oni mogu dobiti pravo na povećane troškove za obavljanje dužnosti? A vrlo dobro znamo da po ovom zakonu predviđa se da je to moguće i ne samo da je moguće nego svi profesionalni zaposlenici u ovoj Skupštini primaju i platu i paušal. Ovo je u potpunom sukobu sa logikom. Ne možete nekome plaćati paušal zato što dolazi na posao a već prima platu za to. Ja sam uputio u skupštinsku proceduru izmjene ovog zakona koji bi jednostavno isključile, a ko ste profesionalni poslanik i primete platu ne možete primati paušal za isti taj rad. A ako primete platu negdje drugdje, naravno da je logično i normalno da primete paušal kao naknadu za rad u ovoj Skupštini. Vlada treba da se očituje o ovoj mojoj inicijativi. Još nismo dobili nikakav odgovor pa sam ja htio da to još preduhitrim i da pitam ovu skupštinu da se danas izjasnimo o ovoj izmjeni. Još ću jednu stvar reći u obrazloženju. Vi morate razumjeti, ova Skupština mora razumjeti da mi smo već vrlo dobro plaćeni za ovo što radimo, minimalna primanja bez TO i svih onih drugih naknada su već trostruki iznos prosječne plate u FBiH. Nema nikakve logike ni potrebe da uzimamo novac koji nam ne pripada zbog neke tehnikalije u zakonu o kojoj niko ne želi da razgovara. Zato vas molim da podržimo ovo i da pokažemo prvo od sebe da smo spremni za promjene koje tražimo od građana kada govorimo o poskupljenjima o raznim stvarima, o teretu koji moramo podnijeti u doba krize, moramo i mi podnijeti taj teret i prvi pokazati da ćemo se odreći paušala, nego da nećemo uzimati paušal koji nam ne pripada."

"Mi smo svi imali u prethodnim mjesecima priliku vidjeti u medijima najavu jednog projekta koji će se desiti u Opštini Trnovo. A radi se investiciji po izjavama zvaničnika iz Opštine Trnovo od 4,5 milijarde KM. Premijeru molim vas možete li nam reći koja je uloga Vlade Kantona Sarajevo u ovom projektu jer po svemu što smo čuli ima strašno puno nelogičnosti i u ugovoru koji smo vidjeli i u najavi ovog projekta a dostavit ćemo i pismeno."

Zastupnik Mirza Čelik je pokrenuo dvije inicijative: "Ja imam dvije inicijative i to obje su za Ministarstvo saobraćaja. Prva je da u što kraćem roku izvrši uređenje raskršća ulica Bojnička – Uglješe Uzelca i Trešnje sa horizontalnom i vertikalnom signalizacijom na području Općine Ilidža. Obrazloženje- navedena raskrsnica se nalazi na jako frekventnoj kantonalnoj saobraćajnici ulica Bojnička. Na pomenutoj lokaciji se nalaze dva autobusna stajališta, ali svakodnevno su građani svjedoci nesavjesne vožnje vozača. Na navedenoj raskrsnici su česte saobraćajne nesreće te s toga smatram da ovom problemu treba pristupiti ozbiljno i u što kraćem roku poduzeti aktivnosti na rješavanju istog."

"Druga inicijativa je također za Ministarstvo saobraćaja da se postave usporivači brzine, tj ležeći policajci na području teritorije Općine Ilidža u naselju Pejton i to u ulicama, Edhema Eke Džubura na mjestu gdje se ukrštava sa Ulicom Josipa Slavenskog i Abdula efendije Kantamerije, kao i u ulici I samostalne brigade."

Obrazloženje: stanovnici naselja Pejton su se usmeno obratili nama u Klubu SDA zbog učestalih saobraćajnih nesreća u gore navedenim ulicama a zbog bezbjednosti djece koja svakodnevno prolaze navedenim ulicama jer te ulice vode prema školi. Zahvaljujem.

Zastupnik Nermin Bjelak je postavio sljedeća zastupnička pitanja:"Moje današnje izlaganje bit će upućeno imam dva pitanja. Moje prvo pitanje bit će upućeno ministru MUP-a Kantona Sarajevo. Molim ministra MUP-a Kantona Sarajevo da mi u pismenoj formi dostavi informaciju o dugovanju FK Sarajevo prema MUP-u i Vladi Kantona Sarajevo.

I drugo pitanje bit će upućeno ministru za boračka pitanja Kantona Sarajevo. Da li je ograničen rok za odgovor o dobijanju jednokratne novčane pomoći demobilisanim borcima. Molim odgovor ministra u usmenoj i pismenoj formi. Svi odgovori u pismenoj formi."

Zastupnica Neira Avdibegović je pokrenula zastupničku inicijativu:

"Pokrećem inicijativu da Ministarstvo saobraćaja Kantona Sarajevo razmotri mogućnost uvođenja zelenog trepćućeg svjetla na uređaju za davanje svjetlosnih saobraćajnih znakova za regulisanje saobraćaja /semaforu, u ulici Alipašina, na raskrsnici sa ulicom Sutjeska.

U nastavku dajem kratko obrazloženje:Veliki broj vozača koji svakodnevno saobraćaju jednom od najprometnijih ulica u Sarajevu, Alipašinom ulicom, zahtijevaju da se, sa ciljem povećanja bezbjednosti svih učesnika u saobraćaju, na semaforu u ulici Alipašina, na raskrsnici sa ulicom Sutjeska, omogući opcija zelenog trepćućeg svjetla.

Semafori koji sa zelenog direktno prelaze na žuto svjetlo, bez trepćućeg zelenog signala, ne ostavljaju dovoljno vremena za zaustavljanje vozila. U slučaju naglog kočenja u opasnost se dovode i ostali učesnici u saobraćaju. Upravo zeleno trepćuće svjetlo služi za upozoravanje učesnika u saobraćaju na skori prestanak slobodnog prolaza i na pojavu žutog, odnosno crvenog svjetla.

Semafora bez zelenog trepćućeg svjetla ima i na drugim prometnim ulicama – npr. u ulici Maršala Tita, na raskrsnici sa ulicom Alipašina, i navedeno treba biti predmet analize Ministarstva saobraćaja, kako bi se utvrdili prioriteta za rješavanje ovog problema.

Molim da Ministarstvo saobraćaja razmotri zahtjev građana i u roku od 30 dana dostavi pismeni odgovor na moju inicijativu."

Zastupnik Hamed Aljović je postavio zastupnička pitanja: "Moje prvo pitanje je upućeno Uredu za razmatranje žalbi BIH. Molim Ured za razmatranje žalbi BIH da mi odgovori zašto ne donosi rješenja po žalbama u predviđenom zakonskom roku jer nezakonito kašnjenje rješavanja po žalbama ima za posljedicu vraćanja predmeta na ponovni postupak i ugovorni organ zbog zakonom predviđene dužine trajanja javne nabavke i vremenskog ograničenja kraja budžetske godine nisu u mogućnosti realizirati neophodnu nabavku.

Moje drugo pitanje je upućeno ministru pravde i uprave u Kantonu Sarajevo.

S ciljem anuliranja i otklanjanja nejasnoća koje su se pojavile a tiču se legaliteta Kantonalnog odbora samostalnog sindikata osnovnog obrazovanja i odgoja Kantona Sarajevo tražim precizno izjašnjenje ministarstva pravde i uprave Kantona Sarajevo o tome koji je kantonalni odbor samostalno upisan u Registar ministarstva pravde i uprave Kantona Sarajevo?"

Zastupnik Eldar Čomor je dao komentar te postavio nova zastupnička pitanja: "Ja nemam ništa novo da pitam, ali moram da kažem da do sada ja nisam dobio odgovor na dva poslanička/zastupnička pitanja iz mjeseca juna i jula. Čak jedno od ovih pitanja ne mogu pronaći uopšte niti u stenogramu Skupština Kantona Sarajevo. Pa ću ja to sada sa skupštinskom službom provjeriti šta je u pitanju. Jedno pitanje ću sada ponoviti a drugo ću pismeno poslati da u roku od tri minute jel to uradim, a tiče se Ministarstva komunalne privrede KJKP VIK, JKP Komunalac Hadžići, Vodostan Ilijaš i JKP Trnovo iz Trnova da dostave izvještaje o izdatim a ne naplaćenim računima za sve motele, hotele, restorane, i autopraonice. Ovo pitanje sam postavio u mjesecu junu 17.06. i do dana današnjeg nisam dobio odgovor. A drugo se odnosi na Ministarstvo za boračka pitanja rad određenih fondacija, a to ću pitanje podnijeti pismeno i nadam se da ću što prije dobiti odgovor na ova dva pitanja."

Usmene odgovore na pitanja Predraga Kojovića, Edina Forte i Ismira Juske dao je premijer Kantona Sarajevo Elmedin Konaković. Na pitanje Nermina Bjelaka usmeni odgovor je dao ministar za boračka pitanja Muharem Fišo.

AD – 2.

PRIJEDLOG ZAKONA O IZMJENI ZAKONA O NADLEŽNOSTIMA ORGANA VLASTI KANTONA SARAJEVO U OBLASTI ZAŠTITE I SPAŠAVANJA LJUDI I MATERIJALNIH DOBARA OD PRIRODNIH I DRUGIH NESREĆA-SKRAĆENI POSTUPAK

Prijedlog zakona su poslanici dobili uz poziv za sjednicu.

U skladu sa članom 158. stav 2. Poslovnika Skupštine Kantona Sarajevo Predlagač ministar komunalne privrede i infrastrukture Senad Hasanspahić je ukratko obrazložio razloge za donošenje ovog Prijedloga zakona po skraćenom postupku.

Predsjedavajući je pozvao poslanike/zastupnike da se izjasne da li će pretres Prijedloga zakona o izmjeni Zakona o nadležnostima organa vlasti Kantona Sarajevo u oblasti zaštite i spašavanja ljudi i materijalnih dobara od prirodnih i drugih nesreća provesti po skraćenom postupku.

SKUPŠTINA JE JEDNOGLASNO (21 „ZA“) PRIHVATILA PRIJEDLOG DA SE PRETRES PRIJEDLOGA ZAKONA PROVEDE PO SKRAĆENOM POSTUPKU.

NIJE BILO PRIJAVLJENIH ZA RASPRAVU PA JE PREDSEDVAJUĆI POZVAO POSLANIKE DA PRISTUPE IZJAŠNJAVANJU O PRIJEDLOGU ZAKONA O IZMJENI ZAKONA O NADLEŽNOSTIMA ORGANA VLASTI KANTONA SARAJEVO U OBLASTI ZAŠTITE I SPAŠAVANJA LJUDI I MATERIJALNIH DOBARA OD PRIRODNIH I DRUGIH NESREĆA.

SKUPŠTINA JE JEDNOGLASNO (23 „ZA“) DONIJELA OVAJ ZAKON .

AD – 3.

NACRT BUDŽETA KANTONA SARAJEVO ZA 2016. GODINU

Nacrt budžeta Kantona Sarajevo za 2016.godinu su poslanici dobili uz poziv za sjednicu.

Uvodne napomene po Nacrtu budžeta za 2016.godinu podnio je ministar finansija Jasmin Halebić. Dodatna obrazloženja dao je i premijer Elmedin Konaković.

Kao predsjedavajuća Komisije za mlade Mehmedagić Mersiha je podnijela Izvještaj Komisije po Nacrtu budžeta Kantona Sarajevo za 2016.godinu.

Pitanja su postavili sljedeći zastupnici: Predrag Kojović, Slaviša Šučur i Hamed Aljović.

Odgovor na pitanje zastupnika Kojovića dao je ministar kulture i sporta Samer Rešidat. Odgovore na pitanje zastupnika Slaviše Šučura i Hameda Aljovića dali su premijer Elmedin Konaković i ministar finansija Jasmin Halebić.

U diskusiji po Nacrtu budžeta Kantona Sarajevo za 2016.godinu učestvovali su: Predrag Kojović, Mersiha Mehmedagić, Zvonko Marić, Semir Halilović, Slaviša Šučur, Muhamed Kozadra i predsjedavajući Sejo Bukva.

Nakon rasprave Skupštini se obratio premijer Elmedin Konaković.

SKUPŠTINA JE JEDNOGLASNO (26 „ZA“) PO NACRTU BUDŽETA KANTONA SARAJEVO ZA 2016. GODINU DONIJELA SLJEDEĆE

ZAKLJUČKE:

1. *Utvrđuje se Nacrt Budžeta Kantona Sarajevo za 2016. godinu;*
2. *Javna rasprava održaće se u kantonalnim organima, jedinicama lokalne samouprave, naučnim i stručnim ustanova i trajaće 28 dana.*
3. *Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.*
4. *Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga budžeta Kantona Sarajevo za 2016.godinu.*

AD – 4.

NACRT ZAKONA O IZVRŠAVANJU BUDŽETA KANTONA SARAJEVO ZA 2016. GODINU

Nacrt zakona su poslanici dobili uz poziv za sjednicu.

Jedini diskutanti po ovoj tački dnevnog reda bili su zastupnik Predrag Kojović i zastupnik Muhamed Kozadra. Odgovor na pitanja Predraga Kojovića dao je ministar finansija Jasmin Halebić.

Skupština je jednoglasno (26 “ZA”) po Nacrtu zakona o izvršavanju Budžeta Kantona Sarajevo za 2016. donijela sljedeće

ZAKLJUČKE:

1. *Utvrđuje se Nacrt zakona o izvršavanju Budžeta Kantona Sarajevo za 2016. godinu;*
2. *Javna rasprava održaće se u kantonalnim organima, jedinicama lokalne samouprave, naučnim i stručnim ustanova i trajaće 28 dana.*
3. *Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.*
4. *Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izvršavanju Budžeta Kantona Sarajevo za 2016. godinu.*

AD – 5.

NACRT ZAKONA O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM

Nacrt zakona su poslanici dobili uz poziv za sjednicu.

Diskutanti po ovoj tački dnevnog reda su bili zastupnica Neira Avdibegović i zastupnica Segmedina Srna Bajramović.

Skupština je (23 “za”) po Nacrtu zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom donijela sljedeće

ZAKLJUČKE:

1. *Utvrđuje se Nacrt zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom;*
2. *Javna rasprava održaće se u kantonalnim organima, jedinicama lokalne samouprave, naučnim i stručnim ustanova i trajaće 15 dana.*
3. *Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.*
4. *Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom.*

AD – 6.

NACRT POSLOVNIKA SKUPŠTINE KANTONA SARAJEVO

Nacrt poslovnika poslanici su dobili uz poziv za sjednicu.

Predrag Kojović, predsjednik Radne grupe koja je formirana da sačini izmjene Poslovnika je podnio uvodne napomene po ovom Nacrtu poslovnika Skupštine Kantona Sarajevo. Nakon uvodnih napomena uslijedila je diskusija u kojoj su učestvovali zastupnik Pindžo Mirsad,

Skupština je jednoglasno (21 “za”) po Nacrtu Poslovnika Skupštine Kantona Sarajevo donijela sljedeće

ZAKLJUČKE:

1. *Utvrđuje se Nacrt Poslovnika Skupštine Kantona Sarajevo;*
2. *Javna rasprava održaće se u kantonalnim organima, jedinicama lokalne samouprave, naučnim i stručnim ustanova i trajaće 15 dana.*
3. *Primjedbe, prijedlozi, sugestije zastupnika i mišljenja radnih tijela Skupštine dostavljaju se Radnoj grupi formiranoj da sačini izmjene i dopune Poslovnika koja organizuje i provodi javnu raspravu.*
4. *Radna grupa je dužna da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga Poslovnika Skupštine Kantona Sarajevo.*

AD – 7.

PRIJEDLOG ODLUKE O VERIFIKACIJI ZAKONA O ISTAKNUTIM SAMOSTALNIM UMJETNICIMA-PREČIŠĆENI TEKST

Prijedlog odluke su poslanici dobili uz poziv za sjednicu.

BEZ UVODNIH NAPOMENA I RASPRAVE, PREDSJEDAVALA JE POZVAO POSLANIKE DA PRISTUPE IZJAŠNJAVANJU O PRIJEDLOGU NAVEDENE ODLUKE.

SKUPŠTINA JE JEDNOGLASNO 23 „ZA“ DONIJELA ODLUKU VERIFIKACIJI ZAKONA O ISTAKNUTIM SAMOSTALNIM UMJETNICIMA-PREČIŠĆENI TEKST.

AD – 8.

PRIJEDLOG ODLUKE O IZMJENI ODLUKE O IZBORU PREDSJEDAVALAČIH, ZAMJENIKA PREDSJEDAVALAČIH I ČLANOVA STALNIH RADNIH TIJELA SKUPŠTINE KANTONA SARAJEVO

Prijedlog ove Odluke su poslanici dobili uz poziv za sjednicu.

PREDSJEDAVAJUĆI JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O IZMJENI ODLUKE O IZBORU PREDSJEDAVAJUĆIH, ZAMJENIKA PREDSJEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO.

SKUPŠTINA JE JEDNOGLASNO 22 „ZA“ DONIJELA ODLUKU O IZBORU PREDSJEDAVAJUĆIH, ZAMJENIKA PREDSJEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO.

AD – 9.

PRIJEDLOG ODLUKE O IZMJENAMA ODLUKE O PREUZIMANJU PRAVA OSNIVAČA JAVNE USTANOVE STUDENTSKI CENTAR SARAJEVO U DIJELU KOJIM OBEZBJEĐUJE ŽIVOTNI STANDARD STUDENATA („SLUŽBENE NOVINE KANTONA SARAJEVO“, BROJ: 24/00 I 21/06);

Prijedlog ove Odluke su poslanici dobili uz poziv za sjednicu.

BEZ RASPRAVE, PREDSJEDAVAJUĆI JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O IZMJENAMA ODLUKE O PREUZIMANJU PRAVA OSNIVAČA JAVNE USTANOVE STUDENTSKI CENTAR SARAJEVO U DIJELU KOJIM OBEZBJEĐUJE ŽIVOTNI STANDARD STUDENATA („SLUŽBENE NOVINE KANTONA SARAJEVO“, BROJ: 24/00 I 21/06).

SKUPŠTINA JE JEDNOGLASNO 23 „ZA“ DONIJELA ODLUKU O IZMJENAMA ODLUKE O PREUZIMANJU PRAVA OSNIVAČA JAVNE USTANOVE STUDENTSKI CENTAR SARAJEVO U DIJELU KOJIM OBEZBJEĐUJE ŽIVOTNI STANDARD STUDENATA („SLUŽBENE NOVINE KANTONA SARAJEVO“, BROJ: 24/00 I 21/06).

AD – 10.

PRIJEDLOG ODLUKE O IZMJENI ODLUKE O IMENOVANJU ČLANOVA VIJEĆA NACIONALNIH MANJINA KANTONA SARAJEVO

Prijedlog odluke su poslanici dobili uz poziv za sjednicu.

PREDSJEDAVAJUĆI JE POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O IZMJENI ODLUKE O IMENOVANJU ČLANOVA VIJEĆA NACIONALNIH MANJINA KANTONA SARAJEVO.

SKUPŠTINA JE JEDNOGLASNO 23 „ZA“ DONIJELA ODLUKU O IZMJENI ODLUKE O IMENOVANJU ČLANOVA VIJEĆA NACIONALNIH MANJINA KANTONA SARAJEVO.

S obzirom da su iscrpljene sve tačke Dnevnog reda Osme Radne sjednice predsjedavajući Sejo Bukva je u 15,45 sati zaključio rad Osmoj Radnoj sjednici Skupštine Kantona Sarajevo.

Zapisnik izradila:

Jasminka Deliahmetović

Po ovlaštenju

SEKRETAR

SKUPŠTINE KANTONA SARAJEVO

Almira Kulovac Šetkić, dipl. pravnik

PREDSJEDAVAJUĆI

SKUPŠTINE KANTONA SARAJEVO

Sejo Bukva